

KONTRATË SOCIALE

Në Shkodër, sot më datë 23.05.2015, palët e mëposhtme:

1. **Organizata Intelektualet e rinj, Shprese** me seli në Shkodër, përfaqësuar nga z. Saimir Beqiraga, në cilësinë e përfaqësueses së aktivistëve të saj dhe një grupimi të madh qytetarësh prej 7800 personash në rrethin Shkodër, siç përshkruhet më mirë në **Aneksin A** të kësaj Kontrate, (në vijim referuar si "**Organizata**");

dhe

2. **Znj. Voltana Ademi**, shtetase shqiptare, me banim në adresën Rr. "Arra e Madhe", nr.59, Shkodër, në cilësinë e Kandidates së Partisë Demokratike dhe Koalicionit "Aleanca Popullore për Punë dhe Dinjitet", për Kryetare të Bashkisë së Shkodrës në Zgjedhjet Vendore 2015 (në vijim referuar si "**Kandidatja**");

bien dakort të lidhin një Kontratë Sociale sipas kushteve dhe termave si vijon:

KUSHTE PARAPRAKE

1. Organizata në kuadër të projektit "**Përballja e Ofertave Politike/POP 2015 – Kontrata Sociale**", mbështetur nga Olof Palme Center Shqipëri, nëpërmjet kontributit financiar të Qeverisë Suedeze, ka organizuar në **Shkodër**, një seri aktiviteteve me të rinj për të identifikuar dhe përzgjedhur nevojat dhe prioritetet me fokus rininë të cilat synon t'ia adresojë Kandidates me qëllim përfshirjen e tyre në politikën, planet dhe buxhetet vendore dhe plotësimin e tyre gjatë mandatit përkatës në qeverisjen vendore, nëse Kandidatja do të jetë fituese në Zgjedhjet Vendore 2015.
2. Prioritetet e mësipërme janë pranuar nga një numër prej 7800 qytetarësh në Shkodër, të cilët kanë nënshkruar peticionin/ dokumentin e prioriteteve, që i bashkëngjitet kësaj Kontrate Sociale si Aneks A dhe përbën pjesë thelbësore të saj.
3. Kandidatja garon si përfaqësuese e Partisë Demokratike dhe Koalicionit "Aleanca Popullore për Punë dhe Dinjitet" për postin e Kryetares së Bashkisë së Shkodrës, në kuadër të Zgjedhjeve Vendore 2015.
4. Kandidatja ka shprehur angazhimin e saj për zbatimin e prioriteteve apo ndikimin sipas rolit të saj në qeverisjen vendore gjatë periudhës së ushtrimit të mandatit të saj për plotësimin e kërkesave të qytetarëve.

Për sa më sipër Palët bien dakort si vijon:

Neni 1 - Qëllimi i Kontratës

Palët e kësaj Kontrate angazhohen të krijojnë një marrëdhënie bashkëpunimi për adresimin dhe plotësimin e prioriteve të qytetarëve, që përshkruhen në Aneksin A të kësaj Kontrate dhe që në mënyrë të përmblendhur janë:

Prioritetet:

- 1. Hartimi i Planit Lokal për Rininë*
- 2. Ngritja e një Qendre Multifunktionale Rinore*
- 3. Krijimi i bizneseve inkubatore për rininë*
- 4. Krijimi i programeve të specializuara për trajtimin e problemeve sociale të të rinjve*
- 5. Zhvillimi i teknologjisë së informacionit online*

Neni 2 – Premtimet e Kandidates

Nëse do të rezultojë fituese në Zgjedhjet Vendore 2005, Kandidatja zotohet të punojë për zbatimin e prioriteteve që paraqiten në Aneksin A dhe nenin 1 të kësaj Kontrate, apo të ndikojë sipas rolit të saj në qeverisjen vendore gjatë periudhës së ushtrimit të mandatit të saj për plotësimin e tyre.

Kandidatja angazhohet të adresojë prioritetet sipas Aneksit A, në politikat, planet dhe buxhetet vendore gjatë ushtrimit të mandatit të saj, deri në zgjidhjen e plotë të tyre, sipas kushteve dhe termave të parashikuara në këtë Kontratë Sociale.

Neni 3 – Afatet kohore

Kjo Kontratë Sociale lidhet pa afat. Kandidatja angazhohet të punojë për zgjidhjen e prioriteteve të listuara në Aneksin A si më poshte:

Prioriteti 1 – brenda vitit të parë

Prioriteti 2 – brenda vitit të parë.

Prioriteti 3 – brenda vitit të dytë

Prioriteti 4 – fillon brenda vitit të parë, bazuar në analizën e nevojave, ky aktivitet do të zgjerohet

Prioriteti 5 – brenda vitit të parë

Neni 4 – Forma e bashkëpunimit midis Palëve të Kontratës Sociale

Bashkëpunimi nëpërmjet kësaj Kontrate realizohet nëpërmjet:

Organizata angazhohet të qartësojë prioritetet për Kandidaten dhe të lehtësojë takimet midis saj dhe grupeve të interesit duke ndikuar në krijimin e një dialogu të përhershëm e të qëndrueshëm midis qeverisësve lokalë dhe komunitetit.

Kandidatja angazhohet të zbatojë në mënyrë permanente mjete për përfshirjen e qytetarëve në çdo vendimarrje, proces dialogu apo konsultimi publik, që ka lidhje apo ndikon për zbatimin e prioritetëve që përshkruhen në Aneksin A të kësaj Kontrate. Për këtë arsye, Kandidatja premtan se është e gatshme të bashkëpunojë në mënyrë të vazhdueshme me Organizatën dhe organet e saj për të rritur transparencën dhe efikasitetin e zbatimit të saj.

Neni 4 – Monitorimi i Kontratës Sociale

Palët bien dakort se Organizata dhe strukturat e saj do të kryejnë aktivitete për monitorimin e premtimeve të marra përsipër nga Kandidatja nëpërmjet kësaj Kontrate Sociale.

Kandidatja angazhohet të plotësojë totalisht premtimet e marra përsipër me anë të kësaj Kontrate Sociale. Megjithatë, palët e kësaj Kontrate janë të vetëdijshme për faktin se për shkak të problematikës dhe pengesave të parashikuara dhe/ose atyre të paparashikuara, premtimet e Kandidates mund edhe të mos përmbushen totalisht, por Kandidatja angazhohet të veprojë në përputhje me parimet e transparencës dhe përgjegjshmërisë sipas parashikimeve të K.Pr.Administrative, për të informuar në mënyrë periodike dhe të detajuar Organizatën dhe grupet e interesit, nëpërmjet takimeve direkte, debateve publike apo mbledhjeve me komunitete të ndryshme, për çdo problem, sfidë, ngjarje apo fakt që ndikon në përmbushjen e qëllimeve të kësaj Kontrate.

Kandidatja pranon që veprimtaria e saj, gjatë përmbushjes së qëllimeve të kësaj marrëveshje të jetë objekt monitorimi nga ana e Organizatës, e cila ka të drejtë të hartojë raportet përkatëse dhe t'i bëjë ato publike, përfshi këtu rrjetet sociale, median apo shtypin.

Neni 5 – Komunikimi midis Palëve

Palët e kësaj Kontrate angazhohen të mbajnë një komunikim të vazhdueshëm ndërmjet tyre dhe të shkëmbejnë cdo informacion të nevojshëm për realizimin e zbatimit e saj.

Neni 6 – Natyra e Kontratës dhe hyrja në fuqi

Palët e kësaj Kontrate Sociale bien dakort që ky akt përfaqëson një dokument në bazë vullneti dhe nuk përbën një akt të detyrueshëm ligjor.

Natyrat e Kontratës Sociale ka në themel të saj përgjegjshmërinë politike, administrative dhe morale të Kandidates ndaj premtimeve dhënë qytetarëve të **Shkodrës**, në bazë të kësaj Kontrate. Për efekt të transparencës, Organizata ka të drejtë që kopje të kësaj Kontrate ta publikojë në rrjetet sociale, media, shtyp etj..

Kjo Kontratë nënshkruhet në dy kopje origjinale, nga një për secilën palë dhe hyn në fuqi në ditën e nënshkrimit të saj prej palëve.


Nënshkrimi i Kandidates

23.05.2015
Datë

SAHIR BEQIRAGI 
Nënshkrimi i përfaqësuesit të Organizatës

23.05.2015
Datë